



**Inhoud :**

Blz 02 - 03	Dee lollege Minckelers	19-01-2014
Blz 04 - 05	Vastelaovend Same	26-02-2014
Blz 06 - 07	Kuns en Kitsj	25-03-2014
Blz 08 – 09	De Boumhut	10-04-2014
Blz 10	Moojerkesdaag 2014	02-05-2014
Blz 11	De Chauvenis	12-05-2014
Blz 12 - 13	Och wat is 't leve sjoen	21-06-2014
Blz 14 - 15	Dat Oranje toch	29-06-2014
Blz 16	Koile in Mestreech	28-07-2014
Blz 17 - 18	Vekansietied	02-09-2014
Blz 19 - 20	Mantelzörg	04-10-2014
Blz 21	Zwarte Piet 2014	19-10-2014
Blz 22 - 24	Zeiverklaos in de stal	18-12-2014
Blz 25	't Waor m'ch 't jäärke wel	31-12-2014



## Dee lollege Minckelers.

“Eindelek”, verzöchde 't Mooswief.” Boe biste al deen tied gewees ? Iech begós miech zörg te make. Iers geiste weg zoonder get te zègke en daan blijfste zoe lang, dat iech miech auf gong vraoge ofste nog wel trök kaoms.”

“Höbsten 't tege miech “? Vroog Minckelers.”Tege wee aandere”? repliceerde 't Mooswief weer. Iech höb hij maonde gans allein gestande.”

Haangend in de takel dee häöm weer trök op ziene sókkel moos zètte, vroeg heer häör of ze neet eve kós wachte mèt häör verwiete totdat heer weer op zien vertouwd plekske stond. Heer meinde op ziene sókkel. Evels stond dee neet mie op zien aw plaots. Dat waor jammers op de vèsmerret. Eigelek is heer bès blij mèt zien nui pläötske. 't Moot hij beslis de hiele week frisser ruuke, bedach heer zich. Vreuger waor 't Vriedags 'ne ramp. Mathijs klaogde ouch altied stein en bein. Aon de eine kant vès en nog 'ns vès en aon d'n andere kant gegrilde kip die häöm zien neusvleugels deed touwkniepe. In 't begin ruuk dat netuurlek bès lekker. Mer nao 'n paar oor höbsten 't wel gehad. In dat verband veel häöm e möpke in. Zouw iech 't Mooswiefke mesjien daomèt get vrunteleker kinne make ? Kin iech dat wel make mèt miene pij aon? Och biste gek. Moot kinne in 2014....Wie heer einmaol dao stevig stond te stoon vroeg heer häör aondach.” De moos neet giftig zien he” begós heer. “Iech gaon diech e möpke vertèlle.”gong heer veurziechteg wijer. “Dink d'r aon, gein sjuinse”, waarsjouwde ze alvas. “

“Nein nein,neet ech . Misjien e bitteke”, veroontsjöldegde heer ziech weer.

“Luuster. 't Is eigelek gein möpke mer 'n vraog. Kinste e bies mèt mer eine .....Jéh wie moot iech dat diech noe fetsojnlek verdutse, zoonder ruizing te kriege.

Eh....,mèt mer eine testickel.”? Heer zag 't hiel gauw. Poeh poeh, dat waor droet. ”Gein idee”zag ze verpópzak. “Mer de taol dieste d'r oethojs bevèlt miech al gaaroets neet. Zègk 't mer. Es iech begin te raoje nao 't antwoord weurd 't toch allein mer erreger. “nen Haven haon!”, kaom 't sjaterend oet de moond vaan Jan Pieter. Heer kaom zellevers neet mie bij. Zoe moos heer um zien eige möpke lache. 't Waor mer good dat ze häöm mèt de nuudege buit aon ziene sókkel hadde vasgemaak. Aandere had heer noe weer op de begaone grond vaan de merret gelege.

“Sjaom dich”zag 't Mooswief, um hij in 't midde vaan de Mert zoeget te vertèlle.

“Veur wat lachste noe neet. Zoeget voonds diech vreuger altied leuk. Iech höb toch niks verkierd gezag.?Of wel soms?” knoterde Minckelers

“Sjaom d'ch”, zag ze nog 'ne kier. Este 't miech vreugs biste deen tied datste weg waors in neet zoe'n denderend gezèlsjap gewees. Zoe möpke vertèlste toch neet aon 'n “lady”.

Gelökkeg is de gaas op zien gaaspiep nog neet koonstant aongeslote, bedach ze zich . Steit heer s'aoevens evels lekker in d'n duuster. “Dat leechpunt”... vaan eus stad Mestreech!”.....

## Opa Jam 2014



En Jan Pieter kós dao neet mèt zitte dat ze 't allewijl allemaol mer ordenair  
voond, zien taolgebruuk. De meujte um 't enzele waor 't ech neet weerd.

De vèsmerret indechteg, boe heer jaore en jaore zien fakkel brannend had gehawwe  
en este luikes get daoveur hōbbe soms noe nog bromde heer veur ziech oet;

”Och leef Mooswifke, *VEUR EINE BÖKKEM ZÈT IECH DE PAN NEET  
OP*“



## Vastelaovend Same:

Hup, de zolder op. 't Regent boete en de wind jaog um t hoes. Dit is perfek weer um nao de verhuisdoeze op zeuk te goon boe-in de vastelaovendspekskes vaan de aofgelaope jaore zitte. Es ziene Hoege Hoeglöstegheid op 't benkelek memint weurd veurgestèld aon 't volk vaan Mestreech, moot iech toch wete wat iech mèt vastelaovend aon en um mien lief gaon haange. Aanders bin iech weer te laat.

Lang doort dat zeuke netuurlek neet. Links en rechts oet de does haange de kleurrieke lappe al maonde te haange. Veureg jaor dao neergezat en neet mie nao geloerd.

'ns Kieke wat dit jaor nog aongetóddelt kin weure. De paoterstoog mèt bonnèt, de slachtersjas,- mèt bloodvlekke - 't hieringekuike, es atribueet, allemaol spöl dat "oet 'is. Zoe wie dat hèt. 't Bere-, ape- en cowboypekske kin hoegoet nog in de gamincortège gedrage weure.

Allewijl is alles sjiek en sjoen. Ouch wat de vastelaovendpekskes betröf. Prachtege kaffee-oonvrunteleke heu, magnefieke pekskes, en haremsjeun aon de veu. En daan die geziechte; ei baar sjmink. De vreempsoortegste vörme weure op de ruimte tösse de oere - bij d'n eine is get mie plaats es bij d'n aandere- gecreëerd. Neet gesmeerd. Nein, gecreëerd..... 't Liekend wel kuns wat sommege devaan make. Magnefiek um te zien. En mien respek veur de meujte die ziech meinig individu getruus um met zoe'n creatie vastelaovend te viere, wèl iech hijbij ouch oetspreke.

In eder stad of dörp weurd 't groet fies, veur 't aonbreke vaan de vastetied, op de veur die plaats geëigende meneer gevierd. Dat is zoe gegreujd door de ieuwe heer. Loer mer 'ns in Aoke wie ze dao vastelaovend viere of in Köln, Rio de Janeiro, (dat lèste is wel erg wiet) num mer op. En wèlste dao vastelaovend ouch mèt kinne viere is dat bès meugelek. mer veer mote us daan neet bemeuje mèt **wie** 't dao gevierd weurd. Ouch al weurd Ziene Hoege Hoeglöstegheid in eus stad oetgerope ten euverstoon vaan "'t volk vaan Mestreech", zoe-es dat geannonceerd weurd,. D'n annonceerder bedoelt netuurlijk; 'n ederein dee in Mestreech is en same mèt die Mestreechtenere vastelaovend wèl viere!

Wijer in mien does grajend kom iech neet vööl tege wat nog vaan pas zouw kinne kaome um es vermómning te gebruke die drei daog. Daan deent ziech de volgende vraog aon. : E Gekoch pekske of e lepke stof kaope en de vrouw of döchters vraoge get inein te stievele? Ze höbbe neet veur niks zoe'n elektrik apparaat dao stoon boe zie es vollierde nejeers de sjoenste creaties op höbbe inein gefisternöld. Es iech dat lèste veurstel aon d'n doelgroep veurlègk is 't enthousiasme neet vaan de loch.....Had iech gedach. Neet dus. Geinen tied Dat weurd dus confectie dit jaor. Of liever gezag. Get striepe op mien geziech, 'nen hood op en in 't daogeleks pekske - dat is confectie - de straot op. Geinen hoond dee dat erg zal vinde. Dus iech ouch neet. De pèlskes en d'n hiering zalle daodoor neet minder smake en ammezere daon iech miech altied. Dat ligk neet aon datginnege wat 'ste aon höbs mer mie aon de lui die'ste roontelum dich verzamels. En aon de maan of vrouw dee/die in wat veur pekske daan ouch, zit! 't Geit jammers neet drum wat drum zit mer 't geit 'm drum wat drin zit !!!!

## Opa Jam 2014



Ein vaan de sjoenste dinger mèt die daog is dat 'n ederein ederein aansprik. Magnefiek. Noets gezeen en toch, juh, onder d'n erm achter 't zaat herremenieke aon en same lache, springe, pèlske drinke, tuut friet same deile, laote biete in e stök gebakke vès en weit iech wat al neet mie.

Mèr daan op Asselegoonsdag. Nevenein in de kèrkbaanke zitte veur 't assekruiske en 't stèl zwiege is weer begonne.....(in de kèrk, zien allewijl wel ' get ' minder lui es e paar oor ieder oppe Vriethof! Hiel get minder maag iech wel zègke....)

En daan nog zoeget Vastelaovends; In 't gewoene daogeleks leve doen veer dat eigenaordeg genóg, neet. Zoemér mèt iemes praote. Boerum eigelek neet? Jao, bij doktersbezoek in de wachkamer. Daan wel. En ouch nog op fluusterende toen Aanders huurt 'n ederein veurwat of 'ste dao zits. In 'n lif vaan e gebouw loere de mieste lui ouch allein mer nao de plafon of nao de grond. Bang dat ze zien dat ze weure aongesproke....Zoe liekend 't teminste.

Good. Es geer dat mèt miech eins zeet, laote veer daan get aofspreke. Op Asselegoonsdag es de pekskes, de kaffee-oonvrunteleke huu, trömmelkes, boa's en berosde trompötte, boe de spei oet is gehaold, weer trök ligke in de verhuisdoes oppe zolder, goon veer gewoen door mèt wat veer tijdens de drei döl daog aon geng hōbbe gezat. Evels wat 't aanspreke betrōf netuurlek. Veer blieven us oonderein goojendaag zègke. Dat allein al zouw prachteg zien. Bewaor die zoer geziechte mer veur 't inlègke vaan hieringe..... kaomend jaor es 't weer vastelaovend is. Heet 't in eder geval nog 'n functie.....

“Laot de boel mer weije, want veer hōbbe vāöl plezeer”( Vrij vertaald oet 't bove Moerdijks).

Dus Boonte Störm; Raoze mer! Ze weite bij 't KNMI nog altied neet dat dee, weer of gei weer, eder jaor euver Mestreech raos. Veer Mestreechtenere drōkke dee windkrach neet oet in ciefers mer in liters per oor.

En och. Boe geer Vastelaovend ouch viert en wie de prinselijke veurgenger ouch mage heite; Maak get gezèllegs devaan.

VASTELAOVEND (veural) SAME !!

Opajam



## Tösse Kuns en Kitsj

Umdat veer lid zien vaan de AVRO - kunstkring leek 't us wel leuk um 'ns 'n opname bij te woene vaan Kuns en Kitsj. Veer hadde ouch nog wel get um te laote taxere op zien weerde. Zellevers voonte veer 't neet zoe sjoen. "Mer de w è ts mer noets wat 'ne gek deveur gief ," zeet 't gezègkde. En al zeker 'ne deskundige. De seraode (want dat waore 't) sjoen ingepak in e duuske. Veer op weeg. Oonderweeg in d'n oto waore veer aon 't filosofere wat eus spölle weerd zouwe kinne zien. Stel dich veur tot 't vööl mie weerd waors es veer dachte. Wat zouwe v'r daan doen ? Metein verkoupe" zag iech." Jao mer ", zag ze toen, "daan kin iech 't ouch drage !" "Oh", zag iech toen weer ; "hingk 't sjoen zien vaan dinger daan vaan de pries aof "? "Nein dat neet netuurlek" zag ze." Mer 't steit wel interessant este get deurs um d'ne nek höbs haange". "Zag 'ste dat mer , es iech diech um d'ne nek vleg" waors mien oonbegrepe repliek....

Oondertösse waore veer op de plaots vaan bestumming aongekoume. Luij , sleipend mèt kartonne doeze, in dekes gewikkelde sjèlderije en m è t neet te indentificere projecte en veurwerpe . Allemaol op weeg naor 't groete geld.....Duudelik te zien , aon de meneer wie ze hun zaakskes verteutelde. Binnen gekoume kraoge veer 't nummerke 678 en woorte de nrs. 300-350 opgerope um veur de experts te versjijne. ech ègk tege mien vrow ;" es de spölle die veer met hóbbe gebrach noe neet aajd zien , zien ze 't in eeder geval wel es veer aon de beurt zien." !! Veer hadde oongeveer twie oor d'n tied um us 'ns alles te besjnoutse .

Zenew els echtig aon hun deerbare stökke plökkend en vertellend euver de herkoms vaan ein en aander , wachtte veer en de aander vermeinde kunsbezitters , op aoproop vaan eus nummerke. Roond loerend leet iech miech oontvallen; " t is allein al 'n "kuns', um al dee "kitsch" good hij te kriege !"

En eindelek kouw daan nao 'n oor ,eine , met han en veuj zwejjende t.v. - mètwërker weer nommers aofrope . Gelökkeg ,veer kóste mèt eus "kostbaor stökke ." riehting slagbaank. Want zoe veulde 't toch wel e bitsje .Dr'op of dr'oonder .In eder geval wat de pries betröf.

D'n expert dee veer mooste hóbbe kós us direk hellepe. De taxatie waor ev els gow aofgelope.....Euze nuijen oto kóste veer wel vergete .Ev els e gezèllg etensje bij de

ierste de bèste frituur zaot nog neet 'ns d'r in. !! Aon de aander täöfelkes gebäörde zjus 't zelfde. Veurdats dat luij kóste oetlègke , dat oonder 't opruime vaan de zolder bij oma dat bewuste sjök teveursjijn waor gekoume , kóste ze hun spölle al weer inpakke. D'n expert sjnapte zich alweer 't volgende "kunswèrk". Allein es get speciaols oet 'n kartonne does woort gehaold of oet handdeuk of dekes woort gedrejt , kouw de camera d'r aon te pas. En daan zaog 'ste de eigenere glundere en zich veur de lens wringe. Geer kint dat wel. De kumps jammers neet eederen daag op tillevisie . En noe brach 't nog get op ouch . Nao 'ne fantastische oetlègk euver 't aongebijene , koume natuurlijk de standaard vraoge ; " U zult wel willen weten wat 't waard is ? Hoe komt u eraan ? Wat heeft u ervoor betaald ? "Zoewiet waore veer ev els gaaroets neet gekaome en drope aof .....

## Opa Jam 2014



'Ne leuke middag gehad , 'n illusie ermer en 'n ervaring rieber stapte veer in d'n oto. 't lerste wat mien vrow in d'n oto doog waor, de seraode umdoen.....Verpópzak loerde iech häör aon.

"Och," zag ze, " de weerde vaan dinger weurd soms bepaold door de emoties en rappelaties die dao-aon verbónde zien en neet door 't geld ! Dat hadde veer gelierd. En daor hoofste eigelek neet veur nao " KUNST en KITSCH" te goon.....



## DE BOUMHUT :

Zo. De steine peedsjes dweers door de nui aongelagde moostem waore klaor. 't Zaog good oet voond iech zellevers. Neet perfek, mer dat hoofde neet. Este mer neet in de modder hoofs te trampele es 't hiemelwater 't land heet bevochteg. Ze höbbe zoe wie zoe de intentie um sjoenpa ampa en pa neet te euverbelaste. Ze, zien de awwers vaan mien twee jongste kleinkinder. Zie hóldegen 't principie ; Beter hiel lang e bitsje werrek daan hiel kort väöl. En iech staon dao netuurlek veur de volle hoonderd percent achter.

Get oonkroed oetdoen en daan e teske koffie onder 't aofdaak. E stökske spitte en daan ...e teske koffie staond, mèt 't gereidsjap ligkend aon mien veuj. Plentsjes verplante en daan e gleske fris neve de daan nog leeg krouwkaar. . 't Hoofaofval opruime en daan.... Daan eindelek e pèlske....en nog eint , onderwijl eus werrek bekiekend en beoordeilend...

'En Slivvenhier zaog ouch dat 't good waor'.

Op die mominte ,es veer zoe bijein zitte, weure miestal ouch de nui ideeje veur in d'n hoof gebore. Zoe ouch tijdens ein vaan die koffiepoozes 't veureg jaor.

De kleinzoon waor wel gecharmeerd vaan 'n boumhut had heer gezag. Wie de familie op 'n camping recreëerde had heer ore in zoe'n hoesvesting veur de jongere jäög doorgebracht. Hoeg in 'nen boum had heer ziech köstelek geammezeerd.

Hunnen hoof had genóg buim die veur zoe'n bouwsel in aonmerking zouwe kinne koume. Oeteindelek veel de kääs op 'ne proemeboum. De stam waor neet al te fors mer in us beleving waor heer wel gesjik. Aofgeloupe week waor 't zoe wiet. De moostem waor gereid zoe-es gezag veur beplanting en inzejje. Dus kóste v'r noe aon de hut beginne.

Geine vaan us tweeje – de sjoenzoon en iech - had ouch mer einege ervaring mèt zoe'n apparaat. Ouch neet mèt tummere. Iech höb oets geperbeerd 'n kas inein te fitsernölle. 'ne Ganse bouwmerret aon hout in hoes gehaold . En sjrouve en negel boeste e gans clubhoes mèt inein kós zètte en wie iech nao weke sjaggernere klaor waor leek 't euveral op behalve op 'n kas.....

Trök nao de hut.

Iers mer 'ns beginne mèt de basis vaan 't bouwwerrek. 't Vluurke. Dat moot degelek zien en veural waterpas ligke. Ouch belaankriek; 't Moot tege euverdaodege belasting, zoe-es springe en stampe, bestendeg zien. Veer bleve mer hout aonsleipe en hadde nao get sorteerwerrek daan toch de gesjikte baddinge en plaanke oetgezeumerd. Nao hiel get dink-, zeegwerrek en 'ne meter plaoster, hadde veer 't vluurke gereid. Veur de res vaan de hut sjoot deen daag geinen tied mie euver. Veer waore mörreg.

“Geleutege wat geit deen tied toch snel este zoe bezeg bis” veroontsjóldegde veer us veur us eige tekortkominge. 'nen Echte sjrienewèrker had in deen tied mesjien wel



## Opa Jam 2014



drei vaan die bouwsels inein getummerd. Mèt dat versjèl dat heer minder plezeer gehad vaan zien werrek es veer vaan de basis vaan us vluurke.....

Gistere belde iech mien kleidochter mèt de vraog of pappa nog weier waor gegaange mèt 'eus ' boumhut. "Jao zeker ampa" zag ze, vrij vertaald ze sprik jammers nog altied Nederlands, "Jao zeker, de zijkante stoon al en d'r zit evels ouch al 'n vinster in " Iech wis neet wat iech hoort. "Knap he, ampa ", zag ze ouch nog tot euvermaot vaan ramp. Vertwiefeld naam iech deil aon deez conversatie. Wat heet de sjoenzoon dat iech neet höb.... Wach get. Iech weet 't al.

Iech höb mien dochter indertied e book euver 't bouwe vaan boumhutte kedo gedoon. Zouw heer dat s'ovends evels geleze höbbe en dao get vaan höbbe gelierd? Zellevers höb iech dat book zoe dèks ingeloerd mer dao oeteindelek niks vaan opgestoke. In dat soort beuk stoon altied veurbeelde die gaaroets neet euvereinkoume mèt dien ideeje. En de boum dee debij steit höbste neet in d'nen hoof.... Daan hèlt 't veur miech al hielemaol op. Zjus wie in 't verkier. Es ze dao mèt umleidinge beginne – dus aofwieke vaan wie 't iers waor – weet iech 't ouch neet mie.

Wie daan ouch. Iech bin benuid of de kleinzoon mèt zien vrundsjes 't bouwsel astrein op pries stèlle. Iech zeen 't al veur mich : Lèdderke op lèdderke aof en dao tösse in 'keet 'make in de hut. Wied eweg vaan 't geblieb vaan de computer mèt zien oonbenöllege späölsekes.

Aonstaonde ampa's. Iech höb 'nen tip. Höb geer 'nen hoof?

Plant daan, wied veur d'n tied dat geer dink ampa te weurde, e buimke in euren hoof. E buimke dat oetgreujd tot 'ne fikse boum! Höb geer al 'ne boum dee daoveur in aonmerking zouw kinne koume, zeeg 'm daan neet um. Mès 'm good bij zoedat heer 'ne flinke stam krijg en dikke zijtek. Verrekes zien 't veurbeeld vaan boe good mèste touw kin leie.. Goej gein aofvalhout mie weg. Geer zalt 't hel nudeg höbbe .

En daan.....?

Jaore later es de vraog nao 'n boumhut kump vaan 't kleinkeend geluif miech, nao 'get' werk mèt zoon of sjoenzoon, is 't allein mer genete.

Same mèt ama, zittend in d'nen hoof mèt e lekker pèlske onder handbereik. En 't kleinkeend; Trepke op trepke aof.....

OPAJAM.



### **Moojerkesdaag:**

Wee begint 's mórgens vreug al te slove  
Wee heet d'n thee al klaor, bruidsjes in de ove  
Wee reup; 't is tied um op te stoon  
Botramme en e eappelke in 't trömmelke gedoon  
De taofel al gedek, 't eike gekook  
En 's winters de kachel al opgestook.

Wee deit de kleier wasse en strieke  
Zoedat ederein diech maag bekieke  
De sjeun en 't hoes gepóts, gezuig en gestöb  
En gezórg dat dienen daag good verlöp.  
's Aovends de kemissies zien gedoon  
En ouch nog nao häör eige werk moot goon.

D'n oto, 't hoes, 't ete, alles moot weure betaold  
Cent weure door diech vaan de baank gehaold  
't Kump neet vaanzellevers op te stoon die poen  
Ouch daó moot MAM get veur doen !!

Vendaog is d'n daag um häör 'ns in 't zönneke te zètte  
En Mam 'ns nörgens op hoof te lètte,  
Noe is Mam aon de beurt: t is Moojerkes-daag.  
En dat ze nog hiel lang veur us zörge maag !!  
Mer nog sjieker zouw 't zien  
Es veer häör door 't jaor ouch 'ns get zouwe oontzien....!!

OPA JAM



## De Chauvenis

Boe zien de mónnuminte s'aovends sjiek verleech?  
Allein in eus sjoen stad MESTREECH.

Boe zien de kaffees en terrasse noets leeg ?  
Allein in eus sjoen stad MESTREECH.

Boe hèt e sträötsje gein steeg ?  
Allein in eus sjoen stad MESTREECH .

Boe is gewawwel nog altied gezeeg ?  
Allein in eus sjoen stad MESTREECH.

Boe weurt hoonger mèt beer vaan taofel geveeg?  
Allein in eus sjoen stad MESTREECH.

Boe kin d'n eine mèt d'n aandere 't bèste euverweeg?  
Allein in eus sjoen stad MESTREECH

Boe is e glaas beer haaf vol, neet haaf leeg?  
Allein in eus sjoen stad Mestreech

Boe bringk e fies hiel get te weeg ?  
Jeh zeker, allein in eus sjoen stad Mestreech

Boe verdrijf 'n zate hermenie alle tegesleeg ?  
Allein in eus sjoen stad Mestreech

Boe weurd e dröpke mèt losse han geleeg  
Aon d'n teek in eus sjoen stad Mestreech

Boe dach geer stoond mien weeg ?  
Netuurlek..... in eus sjoen stad MESTREECH

Opajam



## “Och wat is 't leve sjoen”

Zoe begint e bekind Mestreechs leedsje. Och wat is 't leve sjoen. Mer neet veur ederein op deez eerd. B.v. veur de luikes die op bedevaart goon doen dat netuurlek neet veur niks.. Soms oet dankbaarheid veur verkregen gunste mer miestal um hun zörg te uute bij Slevrouw of aander heilige boevaan ze dinke dat die hun kinne helpe.

Este d'n ouge en oere good de kos giefs zuuste en huurste, boete alle leuke dinge in 't leve ouch vööl élend.

Dao tegeneuver stoon de luikes die aondach vraoge door hun krenk-debeeld flink aon te dikke umdat dat hunne vörm vaan tiedverdrief is.en zie gere die aondach wèlle höbbe

Este nao langen tied 'ne aajd-collega tröfs in de stad , ouch gepensioneerd, zègk daan noets :”Enuh , lang neet mie gezeen he. Wie is 't mèt d'ch ?”. Miestal is daan 't cliché antwoord: “Och , 't moot mer he....”

En daan geisten 't kriege. Edere '...loog' dee 't AZM riek is en hospitaole wied in d'n naoventrint weure in eine raffel afgewèrk. Gelardeerd mèt de naome vaan liechaamsdeile die allemaol de lètste jaore in gebreke zien gebleve. D'r zien deile bij boevaan iech nog neet 'ns wis dat iech ze had. Ouch umdat de aongesprokene 't liefste Latiense naome veur z'n organe gebruik. Dat maak de krenkde toch get ernsteger en interssanter veur de vertèller es dat heer vermoed dat iech zouw insjatte. Iech begin mer 'ns mèt e mètlj-echteg geziech te trèkke onderwijl 'ch de verhaole aonhuur.

De receptuur wat heer moot gebruuke um al die liechaamsdeile weer fatsojnlek aon 't functionere te kriege kump nao 't opnumme vaan alle maankeminte. 'n Poeier vaan dit, 'n tablètsje vaan dat en drei maal daogeleks 'nen eetlepel vaan e drenkske of twie.

“En meinste dat dat hölp ?”geit heer weier “ Bis tiech gek. Die artse sjrieve mer get veur. En veer mer betaole . Hadde ze dao mer 'ns e tablètsje veur oetgevoonde. 'n Betaalpoeier of zoe” Humor had heer sijns ouch.

En iech mer semi geïnteresseerd blieve luustere. Huppand vaan 't ein bein op 't aander.

En daan de financië. Ouch dat nog.

“De wèls 't neet geluive ('n veurspelling die ouch nog woer is) ; De ierste veertien daog vaan 't jaor bin iech al door mien eige risico vaan e gans jaor eweg....! Noe waar dat neet zoe erg, es iech dao noe mer baat bij had....”

En heer vertèlde mer door en mer door mer door en mer door.....

't Woort tied um dit 'opbouwend' gesprek 'ns te bëeindege. Mer wie deiste dat mèt good fetsoen?

“Kom jong , iech moot 'ns opstappe. Haw d'ch good daan kump 't allemaol wel weer op zien puutsjes terech....” Zouw kinne. Zoen ind. Mer mesjien trejste daomèt op de tienekes?

Of mooste de woerheid zègke:

“Kom op jong, loer 'ns roond. Daan zuuste luikes die ech get man-kere en boe tablètsjes,poeiers en drenkskes ech neet mie helpe. En dieste in de stad och neet tegekumps .

## Opa Jam 2014



Dié luikes vinde 't leve de meujte weerd en laope neet te koup mèt hun elende.. En sjei diech noe 'ns oet mèt de geweeklaog en gaank genete vaan 't leve. 't Kin toch zoe sjoen zien.....”.

Mer jeh , op die meneer e gesprek beëindege dat deiste(helaas)neet! Dus de conclusie moot zien: Die luikes blieve altied mer doorgoon mèt hun geklaog. Op verjaordag onder leeftiedsgenote stèl iech altied veur um e keteer de krenkdes door te numme en daonao us euver te geve aon de geneugtes vaan 't leve.....! Iech moot uuch zègke, dat wèrk!

Oh, jao . Nog eve 'nen twiede tip; zègk ezzebleef ouch noets bij 't treffe vaan iemes dee geer al lang neet mie gezeen hób:

“Zo, wat zuustiech nog good oet nao al die jaore”.

Wèdde dat bijnao altied 't antwoord is; “Jao jao, vaan boete ...mer vaan bi.....”

Nump geliek afsjeid zègk hiel gauw vruntelek goojendaag en tot de volgende kier ....Want aandere....

Sjoen weekinde en de daog daonao.

OpaJam

Opa Jam 2014



## Dat Oranje toch,.

't Begint al s'mörgens vreug. Appelesene oetpeerse. Oranje. Get later kemissies doen. Oranje op straot aon de gievels , euveral boeste loers.

Este ein paart wat veur 'ne winkel binnelöps krijgste zwarte vlekke veur d'n ouge este nao de kikkzoserije loers. Oranje Ze zien bestump um de wereldkampioensjappe voetbal en hockey alure te geve. . Attribuute um d'ch zellevers , de vrouw en de kinder um te kleie tot *echte* voetbal- cq hokeysupporters en de hoeskamer um te bouwe tot 'ne sporttempel. Dat lèste kin Pa vergete. Alles heet zoe zien grenze vindt Mam. Hei en dao e veendelke en 'n oranje veer in d'n haor – este die nog höbs, die haore – moot kinne mer daan allein oonder 't voetballe vaan 't (eus) Nederlands èlftal. En zeker neet zoe de straot op!

Iech koup m'ch 'n paar blikskes beer en raaj 'ns wat... Zjus , de blikskes zien ORANJE . Bruudsjes veur oonder de latere wedstrijden , zitte in 'n roed – wit – blauw verpakking. Ouch dao is euver nao-gedach.

Weer trök thoes en m'n gekochte spölkes opgeborge , moot iech vasstèlle dat 't dao laanzamerhand ouch aordeg op Huis ten Bosch begint te liekene. De hoofs mer e keske ope te trekke of dao vèlt d'ch get oranjekleuregs op de grond. Eder momint verwach iech Maxima tege te koume.....

In 't hospitaal, verzörgingshoeze en aander openbaar gebouwe kinne ze ouch get devaan. Hiel gezèlleg .Dat wel. Mer vaan de neet voetballeefhöbber weurt daodoor toch einege aanpassing gevraog. De kans datste 'ne persoan, blozend op zoen oranje oetrolbaar pepèrre fluitsje tegekumps in de geng, is ouch mer erg klein. Mer de sjrik isb des te groeter es 't tich euverkump.

D'n tille-visie mer 'ns aongezat.

't Inmens gekreun vaan de tennisters in Peries is gelökkeg achter de rögk. Aon 't gekeek te huure bij edere slaag vaan de dames, ligke die noe oonder-tösse aon de zuurstof.....

Nederland 1; Louis van Gaal gief 'n peersconferentie. Achtergrond oranje. Twie secundante zien gekleid in , jeh zeker , T-hummekes , wit mèt oranje kreegskes. Zap; Nederland 3 : Geluif 't of neet, dao renne m'ch 'n raffel oranje kleidsjes euver 't sjerm mèt 'nen umge-dreide wandelstek in hun han euver e greun veld - dat weer wel – achter e wit belke aon. Dat belke moot tösse drei buiskes mèt e nètsje terech koume boe-tösse ouch e meideke steit. Teminste dat dink iech. Aon de boetekant is dao door de besjermende kleier niks vaan te zien. Dat is bij de veldspäölsters wel eve aandere....

De coach löp zenewelsechteg sjriewend langs de lijn um die meidekes drop te blieve wieze nao welke riechtige buisconstructie zie moosde speule. Hiel belaankriek um te kinne winne. En dat doge ze . Op nao de finale! De commentatopr bevestigde dat nog 'ns; Oranje in de finale ! Es of iech kleureblind bin. Geer wèt oondertösse of ze dee finale höbbe gewonne.

## Opa Jam 2014



Kortum luikes, veer zitte in 'ne leuke en gezèllegen tied. Ofste noe thoes loers of datste op 't graasveld, tösse oranje gekleurde en mèt plastic ingepakte hoezer zits 'n partytent. same mèt de naobers. Pèlske debij ,chips, neutsjes en aander hepkes en mèt aofgeknawwede vingernegel, maak d'r e fies vaan. Spaonse voetballers zitte op 't momint dat iech dit sjrijf nog nao te bubbele vaan al dat oranjegeweld.

Um alles e bitsje te relativere , nog einen tip:

Loert avventouw ouch 'ns eve nao t' journaal op Nederland 2.....

Opajam



## Mestreech

Mestreech Mestreech, euveral koile  
Euver berg grond mer neet te moile.  
Wat doen ze toch mèt diech ?  
En 't sjoenste, ze vraoge niks aon miech.

De weurs 'n stad vaan tunnels en brögke  
En dat allemaol euver eus rögke.  
De passante gedrage z'ch es 'n mol  
Oonder de grond dao is hun 'hol..'

Tunnels weure gegraove bovenein  
Boe-in astrein otokes raoze ,achterein.  
Zie rije oonderlangs d'ch mèt 'n vaart  
De besteis neet mie bij hun op de kaart !

Dien silhouet is oonziechbaar gewore  
Vaan Aw Brögk tot Kèrktore.  
Mer veer, die bovegronds vaan diech genete  
Veer goon door en laote dat ederein wete;

Mestreech verwijnt noets oonder de grond  
't Blijf zoe-es 't altied de bove stond.  
En wèlle ze dat mèt us mètbeleve  
Och, daan stoppe die ootookes mer eve.....

Opajam





## Vakantietied.

Onderwijl iech aon mien tas koffie slörp- eve huurbaar make wie lekker of dat is – klettert de rege roontelum 't hoes tege de roete. De dröppels vörme in d'n hoof en op d'n hooftaofel 'ne spontaone rijaloet . Sjiinbaor vinde ze 't zelf erg leuk.... E peulke weurt 'ne pool en greujt oet nao 'ne vijver...

M'n gedachte dwaole aof nao de luikes op campings. Vaanoet de bungalowtent of vörtent vaan de caravan aofwachte tot de bui veurbij is.

't Geluid vaan opegaonde ritsletinge gief aon dat hei en dao al iemes zich boete de besjermde omgeving vaan 't 'vekantieverblief' wèlt begeve. De bui is euver..

Stievele aon en pratsjend door 't graas laopend, weurt de sjaoj opgenome. "Enneh?", reup de naoberse "vèlt 't mèt? Bij miech wel!" reup ze .." Nouw, hei is 't um te jenke. Al steit oonder water ", zeet z'n tent inloerend.

Dit soort conversatie kinste nao zoen wolkbreuk op hiel vööl plaotse op de camping huure. Complete interieurs weure – mèt hölp vaan aander campinggaste – oet de tent gesleip. Groondzeile weure euver hègeke en steul gegoejd. De vrouw trejt bijnao op häör eige geziech....zoe laangk is 't.

Tege kinder weurt gesjriewd, "neet zoe in de pole te springe". Onderwijl dát noe zjus veur hun 't ultieme plezeer is! Goon dus ouch gewoon door.

Pa begint alvas e geutsje roontelum de tent te graove. 'n Sumpel meneer um bij de volgende bui 't hiemelwater boete de tent te hawwe.

Mam hoop dat 't zönneke gauw geit sjeine zoedat de spölle kinne druuge.

Ouch 't houwelek weurt op zoen mominte daoneg op de proof gestèld De ein hëlft welt dit noets mie mètmake en begint mèt häör defendering in 't veurdeil vaan de caravan. D'n aandere blijf kampere 't sjoenste wat er is vinde. Dao bringk 'm geine regebui vaanaof!

Dat ieweg gesleip mèt de ieskas, 't gaaskomfoor, 't grondzeil, 't kleierkeske gemaak vaan tentdook boe alles vochteg in weurt en blijf. Nein geef häör mer e verblief op rajer. D'r zien gooj reie genóg veur. De maan, welt neet dat op die mominte ziene hobby weurt aofgenome. Heer heet niks mèt die sleurhut, achter ziene oto haangend aon de welvaarts-knóbbel..(trèkhaok).

Nao aonkoms op 'n camping begint 't opzètte vaan 't verblief veur veertien daog. Es 't geregend heet, is dat natuurlek ouch neet alles. Mer laot häöm mer lekker euver de grond kroepe in 't naat graas, um de hieringe in de grond te kriege. Dat kin wel pas es de familie is gemobiliseerd oonder 't tentdook um de zaak op z'n plaats te hawwe.. Provisorisch. Dát is 't veur häöm. Daan de tent tuige, 't grondzeil lègeke en 't inruime kin beginne. Heer pak zich 't mètgebrach steekwegelke, de kroek en geit oondertösse water hole. Onderweeg geliek oetloerend boe de toilette, de douches en de winkel zien. Es heer trökkump kin de gaas aongeslote weure. De binne-tente – slaopruimtes - moot heer ouch nog eve aon de buize haange. Twie en 'n haaf oor later zitte ze daan veur de tent. Oetgetèld!!

Iers zoen 800 km gereie in 'ne gleujend heiten oto. Daonao alles geïnstalleerd veur e verblief vaan twie weke en daan eindelijk, eindelek....kinne ze goon genete.

Dat welt zègke ..... es 't druug blijf en de kinder neet gezeuk hove te weure. En es heer 's nachs - onderweeg nao 't toilet mèt de closètrol oonder d'n erm – neet drachter kump dat de weeg nao de sanitaire ruimtes wel erg laangk is. De pole oontwiekend – op eine flinke depe nao - es heer in d'n duuster eindelek die

## Opa Jam 2014



ruimtes heet gevoonde, reup heer op neet mis te verstone meneer Slivvenhier nog  
eve aon. Mer good dat ederein sliep.....  
En iech? Hiel veurzichtig slörp iech nog 'ns aon miene koffie en loer euzen hoof  
in.....en geneet. Heerlek! Wat 'n rös!  
OPAJAM

## Opa Jam 2014



### Mantelzörg.

De huurs allewijl , noe op de zörgverliening allein nog mer bezuineg weurt , de wäörd participatie en mantelzörg valle esof 't e oetstepke nao e pretpark betröf. Zoe vaan, dat doen veer eve.

Veer kinne op dit momint es ervaringsdeskundege devaan mètspreke

Eine vaan us tweeje is de zörgbehoeftege en d'n aandere de oetvoerende partij. De mantelzörger. Veer krökke bij-ein.

Dat welt zègke ; twie echte krökke zörge same mèt eine dee door z'ne leeftied en fysieke maanke-minte deen titel vaan 'krök' heet gekrege deveur, dat de mantelzörg-behoeftege (de veerde krök) weer aon 't laope kump. Snap geer 't nog. Dit neume ze dus ouch; participere. Keuning Alex kraog 't al bijnao neet oetgesproke laot stoon dat veer 't oetgevoerd kriege.

Ein vaan de ierste opdracht nae thoeskoms oet 't hospitaal waor de was te sjeie in boonte en witte was. 't Zweet braok m'ch aon alle kante oet. Noets gedoon. Wat iech aon kleier aon hób dao kin iech neet vaan zègke wat noe boont is en wat neet.. De trèks dat aon en wijer niks. Noe moosde iech 't eint vaan 't aander sjeie. Twie vekskes vaan 't masjien völle . Eint mèt waspoeier en eint mèt wasverzachter. Mer boe wat in moosde stound neet debij. Eve bij de zörgbehoeftege informere.. Veur de zoevölste kier. Toen de boonte was in 't masjien . Iers nog aon de groete knóp drejje en op 't zjuste program zette en op weer 'ne aan-dere duie, de waterkraon ope en eindelek kaom beweging in 't apparaat. Noe doog heer pas wat heer moosde doen ; WASSE! Poeh poeh .

Wie 't masjien stopde en iech de was droet haolde waor iech zoe blij wie 'ne gek. Alles had nog dezelfde kleur. es wie iech 't drin had geduid.

Hup alles d'n druuger in. De knóp op 'kasdroog' en druuge mer. Toen de verrassing. 'Kas-droog' zouw dat beteikene dat de was es 't program waor aofgeloupe zoe de kas in kós ?? Wat 'n oetvinding. Wat e prachteg apparaat. De techniek steit veur niks. Wat mekkere die vrouwlui toch. Alles weurt veur hun gedoon.. Mer wat bleek achteraoef ; niks zoe in de kas!! Alles wat iech droet haolde moos ouch gestreke weure..... Stök veur stök opdracht die door 't hoes galmde vanoet 'ne gemekeleke stool mèt ein krök drin en twie krökke in 'ne perrepluubak ,deneve.

Toen stöbzoeke. Iers de stöbtuut vernuie. Ouch weer zoe get. Wie 'ne frittetuut oetzuut hoof m'ch geine te vertèlle mer 'n tuut veur in dat apparaat.....? Ligke op de keldertrap woort m'ch gezag. Mèt de aw (de tuut) nao 't rèk op de keldertrap. Gauw gevoonde. Um dat dink te montere mooste hoegere stöbzoekkunde gestudeerd hóbbe. Iech begós zoe stèllekes aon e enorm respek te kriege veur deginnege die bij leve en goodzien dat werk altied doog. Mer veur dee mins dee de participatiewèt inein heet gefisternöld kin iech gei respek opbringe. Num m'ch neet koelek.

En 't góng mer door. Eve de bèdde opmake, eerappele sjèlle, greunte zuuver make, vleis oetlègke, de deepvrezzer iesvrij make, blajer in d'n hoof opkere, kemissies doen, eve nao d'n apthieker, koffie make veur de fiziet, de hólpbehoevende e glaas water

## Opa Jam 2014



bringe veur de medicijne, tillefoon oppakke,.....ezw ezw ezw En alles mèt plezeer  
gedoon. Gewoen umdat ze 't verdeent!

En daan, daan eve de mantel vaan de zörg oet, achtereuver in 'ne 'luie stoel'  
plóffe en dao de ierste paar ore neet mie oet koume. E middagdutje doen dat  
oetgreuj-de tot 'ne middagDUT. Dat waor de beloening. Veur vendaog. En mörge ?  
Och, dat zeen iech daan wel weer. Participatie ? Gaank d'r mer aon stoon. Wel  
sjiek esten 't kins opbringe netuurlek, Mer de echte awwere mins.....???.....Die  
verdene dat toch ouch.

OpaJam



## Zwarte Piet. 2014

Wie is 't meugelek ? 'n Vraag die iech miech stèl en mèt miech hiel vööl aander luiques. En nog mer 'ne kier: Wie is 't meugelek?

Onderwijl aon d'n aandere kant vaan Europa de keugel en de bomme um de oere vlege vaan de luiques, make luiques ziech hei drök euver de huidskleur vaan ZWARTE Piet. Alle begrip veur de nui Nederlanders die um de reie die ze aonvoere, vergeliekinge treffe mèt hun veurawwers. Mer zwart is zwart. Waors heer Witte Piet of paors of geel of roed daan waor mesjien weer 'ne aandere gróp medelanders die z'ch dao tege verzat. umdat in e wied verleie get is veurgevalle wat noe neet door de beugel kós.'t Is mer boeste veur kees. 'n Traditie behawwe – in dit geval veur awwers en kinder- of ze in wat veur opziech daan ouch veraandere of laote verdwijne.

Standbeelden in eus lendsje drökke al 't respek oet veur allerlei gebäör-tenisse boebij slachoffers zien gevalle of luiques geïerd weure veur hun inzat veur 't welzien vaan dit land. De kinder weurt dat wel op sjaol bijgebrach, dat respek. Laot hun toch in hun onnozelheid hunne kindertied, dee mer zoe kort is allewijl zeker, viere. Ouch de kinder mèt hun awwers die oet oorlogsgebiede koume. Mote veer hun en eus kinder verbeje oorlogske te speule boebij ze pief paf poef rope en veur wee dat bedoelt is touwrope: “ Sjeufke, neet doorlaope , de bis doet...!” Daan kump pa nao boete dee gifteg vreug; “Sjeuf kom 'ns hei jong. Wètste wel boeste mèt bezeg bis?” Bèste lui dat kin toch neet.. Of es ze aon 't speule zien mèt e vliegmasjien en 't in hun speul laote crashe of hun otokes laote bótse, ze mote stoppe mèt dat speul umdat dat luiques die zoegget versjrikkeleks - want dat is 't – hóbbe mètgemaak , z'ch dao-aon zouwe kinne sture.

Laote veer dat de kinder toch gunne in 'nen tied vaan bliep bliep oet smartfone, computer en tablet ( neet vaan sjokkelaat ) es ze dao-op späölseleks 'speule'.. Hun laote genete vaan 'n jaorleks trökkoumende traditie zonder häögenis aon wat veur 'nen oorlog of versjrikkeleke gebäörtenis in de wereld daan ouch. Later op sjaol kriege ze genóg élend euver ziech oetgestruid. Mer noe tijdens de fiesdaog eve neet.

En tegestenders , komp 'ns loere nao de cortège mèt Vastelaovend. Alle kleure tösse wit en zwart trekke aon uuch veurbij. Lol plezeer en sjariteit vertegewoordege die kleurrieke figure. Daan gein vergeliekinge mèt wat veur grópering daan ouch in de wereld. 't Zien fantasie figure.....

En eder vergelieking mèt bestaonde persoene , feite en gebäörtenisse is puur touwval..... Zwarte Piet evezoe...

OpaJam



## **'Zeiverklaos' in de stal.**

"Sjuif 'ns get op diech" balkde d'n ezel riechting os. Heer waar gistere , nao 'n laank rôt te hōbbe aofgelag, in de stal aongekoume. DE FAMILIE waar eve nog get wandele. Mária gong groet en leep op 't lèste. De rit op d'n ezel had häör gein good gedoon. Evekes de beinekes strekke dus.

D'n os, dat moot gezag, naam wel hiel erg vääöl plaots in in de stal. "Hōbstiech noe altied get te balke" loeide d'n os. Laammeker. 'Mote veer noe ech koej vrun weure' zoe-es ze dat in Mestreech zègke. De bis koelek einen daag hei. Daan smetsj iech te zier oonder 't trökknawwele, daan weer, löp tevääöl zeiver oet miene moond. Of iech eet te slókketeg en noe num iech weer tevääöl plaots in. Kinne veer noe ech neet, zonder vreigel nevenein leve?."

"Diech gedreugstich zjus wie de mins. "góng d'n ezel weier " Die hōbbe ouch altied vreigel oonderein. En es get te slókke vèlt zien ze debij."

"Dat zal daan wel" repliceerde d'n os, mer dat nump nog neet weg datste 'n irritant ezelke bis. Evels veur miech in eder geval."

"Gistere zaotste nog mèt d'n hiel hōbbe en hawwe in de voorbak dee veur miech bestump waar", enzelde d'n ezel weier. Euver slókke gesproke. En daobij veer zien hei in Bethlehem en neet in Mestreech! Diech mèt d'n spreuke .....

Dao had d'n os neet vaan trök. Heer had gistere zoenen hoonger dat heer inderdaod neet oet de voorbak vaan d'n ezel kós blieve. 't Hui en de eppelkes. Heer kós 't neet laote ligke. En wie d'n ezel eve d'n aandere kant oploerde had heer binne 'n mum vaan tied alles in z'ne gieles gehojd.

"Euver op 'ne mins liekene gesproke "gong d'n ezel wijer. Iech had gistere 'nen druim dee zjus 't tegendeil bewijs. Hōbste al 'ns gedruimp vaan 'ne Keersmert? Nein? Nou ,iech wel." "Iech weet neet ins dat zoeget besteid ", knawwewelde d'n os.

" 'ne Keersmert ", balkde d'n ezel, "weurd gehawwe - evels dat druimde iech dus - omdat de luikes op deez eerd alvas in de stumming gebrach mote weure veur Keersmes".

"In mienen druim begōste ze dao al mèt zoe rond September. Sjijs waar de kommérs bang dat de luikes neet op tied in de zjuste stumming kaome um hun portemenee te trekke.Want dao geit um".

Wat waar iech blij toen iech wakker woort zègk. Wat 'ne tralala op dee mert. Wat dao stond oetgestald. Neet te geluive. 't Had niks, mer daan ouch hielemaol niks mèt Keersmes te make. 'ne Kitskraom dat wèlste neet wete. En daan dat ete,ete en nog 'ns ete. Vaan gevōlde kwartel tot gevōlde kalkoen. En alles wat dao tösse ligk."

"M'ne leve Slivvenhier (heer loerde mèt haaf geslote ouge eve nao d'n hiemel en prevelde; "Nump miech neet koelek."), m'ne gooje leve Slivvenhier, wat dao gesjók woort ! Dao zouws diech, m'ne bèste os, mèt dien hiel familie e jaor laank vaan kinne

## Opa Jam 2014



ete. Waffele - werm of kaajd, mèt en zonder sókker, praliènes, braod-weurs, gebakke vès, petatfrit. Te vääol um op te numme. Laot stoon um op te ete!”

“Iech druumde dat ‘t fles – op d’n daag dat Slivvenhier ‘t levensleech zuut – allein mer weurt gevierd mèt veurnaomelek ete en drinke. Nao de kerk goon? Dat waor vreuger. Allewijl hoof dat neet mie.....”.

“Noe waor dat ‘nen druum. Mer iech bin bang” gong d’n ezel weier, “dat es astrein ‘t kinneke gebore is, ‘t ouch ech zoe geit.”

”En kiek us noe. Hui en e eppelke in ‘ne ermeujetege stal örgens in ‘t veld. Verrekkend vaan de kaw. Wie iech dao zoe rondleep – in mienen druum nog altied - dach iech ;” Ezel, d’n os zag daan wel dat stiech op de mins liekendes en dat zal daan ouch wel, mer heer zellevers, d’n os, liekend nog mie op de luikes op deez eerd. Al is ‘t allein mer door zien eetgedrag! En daan is dat wat iech zaog nog mer e veurpreufke vaan wat nog koume geit. Iech zeen in mien gedachte de luikes al aonzitte aon ‘t Keersdiner. In de kiekete vaan de restaurants hónge de menu-kaarte mèt de lekkerste menu’s. Lek vinger lek dom. Dat wel. En hei en dao woort al veur die diners afspraoke gemaak. (Daan hóbbe ze thoes neet zoe vääol werrek....) zagte ze! Wiezoe hoeseleke gezèllegheid?? Kinstedich veurstèlle, dat iech blij waor toen iech wakker waor. En neet um alles wat iech op dee mert had gezeen. Nein, mer dat iech toen drachter koum dat ‘t gelökkeg mer ‘nen druum waor gewees...”

“Zouw dat in werkelekheid ouch zoe goon?”, vroeg d’n os verpópzak.

”Nogmaols lech druumde “, balkde d’n ezel .”Mer de mins e bitsje kinnende, hób iech gein inkele rei um dao-aon te twiefele” .

“Sjjjjjt”, fluusterde d’n os zeiverentere vaanoet ‘t struu “Sjjjjjt Dao koume de luikes trök.”

Joep waor mèt Mária e stökske goon wandele in d’n naoventrint. ‘t Waor oonderdehand al duuster en ze hadde gezeen dat de herders hun sjäöp aon ‘t tülle waore. ‘t Wachhawwe kós beginne. En trouwens, ouch Mária en Joep waore aon rös touw .

“Iech waor al bang dat geer verdwaold waor” balkde d’n ezel. “ Joep maakde e gerösstèllend teike nao d’n ezel en toende ziene wandel -TomTom aon d’n ezel.....

“Zo, daan kin iech noe eindelek ouch goon slaope” knawwelde d’n os. Heer dreide ziech ‘ns lekker in ‘t stru en kós neet naolaote toch tegen d’n ezel aon te kroepe. Heer zeiverde nog get en sloot z’n ouge. Mer neet veur lang,

In die nach woord Slivvenhier gebore. De herders in ‘t veld hadde de bouzjies zien branne in de stal en huurde e kinneke jenke. Ze koume nuisjiereg korterbij um te kieke wat aon de hand waor. Verpópzak loerde ze nao ‘t prèl gelök in de krib. Ze hadde sjäöpkes mètgebrach, um ‘t kinneke te werreme en nog get wortele en aander greunte veur de Familie. D’n os , oonderwijl wakker gewore door de vieziet , zaog wie ze de greunte aon Joep gaove. Heer kós niks draon doen mer weer leep ‘m de zeiver oet z’ne moond. D’n ezel keek nao häöm en rappeleerde zich d’n druum

Opa Jam 2014



euver de Keersmerret mèt alles drop en draon... Heer zag mer niks dao-euver. Eine moot toch 't veurbeeld geve.

**Rös , vrei en beheersing ,**

dat waar de kemissie die die twie aon dit Keersfies verboond. En zoe'n wezes neume ziech evels . 'nen ezel en 'nen os .....

't Woort nog hiel drök deen daag roond en in de stal.





**2014 't waor m'ch 't jäärke wel**

De 'crisis' beheersde eus leve  
Mèt sjattinge zaote ze ummer deneve  
Iers woorte veer bang gemaak  
Mèt oetgeve woord gauw gestaak  
Salarisse bevrore, zoe wie dat hèt  
Wat v'r hadde, dao doge veer 't mèt  
Ederein klaogde stein en bein  
Wie kriege veer nog e centsje bijein?  
Veer lierde weer minnesjere  
En hoofde dus neet te krepere.  
Gein twie oto's op de oprit mer eine  
En soms zelfs hielemaol geine.  
Of dat dingk dèkser laote stoon  
En mèt de fiets nao 't werk goon.  
Neet ederen daag vleis op d'ne teleur  
't Gezin inclusief hoond en kat goon deveur.  
De verwerming e gräödsje minder gezat  
Op 't resultaat vaan dat alles goon veer prat.  
En terech! Weer files in de winkel aon de kassa  
D'r weure weer centekes oetgegeve door de massa  
Waor 't noe ech 't aofgelaope jaor allemaol zoe erg?  
Veer loerde de tegenop wie 'ne berg.  
't Is bès te doen , leve mèt minder  
't Bezörg d'ch allein get mie hinder.  
Vaan 'ne 2cv nao 'ne Mercedes goon  
Is get boe veer allemaol veur goon  
En weer trök nao 't begin, d'n 2 cheveaux  
En in 't ergste geval nao de velo,  
Is gebleke dat veer dat ouch kinne  
Zjus wie neet ederen daag goon pinne.

**2014:** e jaor dat us trök op de rails heet gezat en aon 't dinke  
Veer moosde 't allemaol eve laote bezinke  
Rampe ,oorloge, de minsheid bleef 't neet bespaord  
Ouch woort neet trökgedeins veur weer 'ne maord.  
Helwèrkende lui aon de kant gezat en z'ch sjaggernere  
Umdat door HUN oontslaag HUN bedrijf kós doorfunctionere.

**2015:** Laote veer compassie blieve toene mèt luikes in d'n vreemde  
Mèt kraanke ,gehandycapte die 't éch minder hóbbe en oontheemde.  
Veer blieve hope veur de luikes zonder werk  
Hun aon 't werk kriege maak Nederland weer sterk!!

Zaoleg nui Jaor en veural 'n gooj gezondheid  
Sjaggerneer uuch neet euver wat geer had  
Mer geneet mie vaan dat wat geer nog hób !!!  
Opajam

Opa Jam 2014



## Opajam:

Eugene heeft ook een boek uitgebracht getiteld 'De Kaafmouze'. Eugène Schoenmaeckers (1937) schrijft al jaren met veel passie in 't Mestreechs. Voor de familiekring, maar ook voor [www.kengkee.nl](http://www.kengkee.nl) en voor de Baorebinder, het huis-aan-huis blad van Heugem.

Zijn geuzennaam dankt hij aan kleindochter Fleur, die de naam Opa Gène niet kon uitspreken, en er Opajam van brouwde. Deze bundel bevat 60 eerder gepubliceerde columns, verhaaltjes en gedichtjes. Een lang gekoesterde wens, om de liefde voor de Maastrichtse taal te delen met zoveel mogelijk lezers, gaat met dit boekje in vervulling.

Boe zeet me kaafmouze tege verleeft praote? Boe kin d'n eine met d'n aander 't bèste euverweeg? Boe dach geer stoont mien weeg? Netuurlek... in eus sjoen stad Mestreech!

te bestellen via de site van ['Mijn Bestseller'](#).

*Ouch weer veur 2014 miene dank en bewoondering aon OpaJam veur de sjeke verhäolselfkes en gediechskes.*

*John Kerkhofs  
MestreechterSteerke  
[www.mestreechtersteerke.nl](http://www.mestreechtersteerke.nl)*